

Ini Denu Sa

MEDOO TEGEKUKUM

Migsabà Sa Tanà Islaél

Ini Denu Sa Libelu Tegekukum

Na, iya sa tinulon diyà siini sulat sa egkebaelan sa medoo tegeIslaél edung egoh da anay neketepel sa tanà Kanan taman sa egoh da mighemilì sa datù da. Egoh iya, duen medoo ulu-ulu da ginela i Nemula nesetugdugtugdung pinengadanan da tegekukum, owoy takaan da eg-uwit sa medoo дума da amuk gumila da diyà sa medoo kuntelà da. Na, si Samson sa sebaen ulu-ulu da ginela i Nemula miglalag.

Iya sa igtulù diyà siini libelu, amuk egpangunut sa medoo tegeIslaél diyà si Datù Nemula, mepion doo sa keugpà da. Dodoo amuk endà egpangunutan da duu, nehaa da sa dakel kelikutan. Apiya di pa endà egpangunutan da duu owoy dakel ma sa kelikutan nehaa da, tapay doo ungayà i Nemula umaluk kenagda amuk mesenulê da owoy amuk migtuu da dema diyà kenagdi.

Na, beken sa langun kagi di sa nekesulat diyà sa kagi Menubù.

Ini Sa Pesuwan I Nemula Endà Dé Migtabang Sa Medoo TegeIslaél

2 ¹Na, mig-angay sa Egsugùsuguen i Datù Nemula^a diyà sa menuwa Bokim kedu diyà Gilgal, enù ka duen sa ikagiyen di diyà sa medoo tegeIslaél. Guwaen di, “Linaun ku kiyu kedu Igiptu dò, owoy inuwit ku ma kiyu dahini diyà siini tanà igpasad ku ibegay diyà sa medoo tupù yu. Owoy mig-ikagi a endà tipayen ku duu sa nesesapadan ta. ²Hinawidan ku kiyu anì endà mesepasad yu sa medoo tapay etaw eg-ugpà diyà siini tanà. Igsugù ku polo keniyu ipelukat sa medoo atung kenà da eg-ulow sa ibegay da diyà sa medoo egpenemulawen da. Dodoo endà egpangunutan

^a 2:1 Beken sa liyu egsugùsuguen i Nemula ini i, dodoo tigtu Nemula. Egoh anay egoh i Hésus endà pa migtebow diyà tanà, medoo gulê mig-angay Datù Nemula i egtelabuk diyà sa etaw. Sa Egsugùsuguen i Datù Nemula sa ngadan di amuk egtelabuk diyà sa etaw.

yu duu iya wé igsugù ku keniyu. Maen di ya endà egpigtuuwen yu duu aken? ³Huenan di, ini sa ikagiyen ku diyà keniyu ini egoh di. Endà dé tabangan ku duu kiyu humemaga sa medoo tegeKanan amuk sumeildud-ilud yu. Dodoo edung ini egoh di, kuntelaen da dé kiyu lagà da sa dugi diyà sa kabigan yu. Owoy lagà katal ma diyà keniyu sa medoo egpenemulawen da.”

⁴Na, egoh sa medoo tegeIslaél migdineg iya wé inikagi sa Egsugùsuguen i Datù Nemula, migsinegaw da temù. ⁵Huenan di, pinengadanan da Bokim^b iya wé kenà da. Agulé inulow da sa medoo hinagtay inimatayan da enù ka egpegeniyen da sa kepeuloy i Datù Nemula diyà kenagda.

Ini Sa Ego I Hosuwa Nematay

⁶Na, pineipanaw i Hosuwa sa medoo tegeIslaél owoy eg-angay sa uman segeumpung egkuwa sa hagda baed tanà diyà sa tanà Kanan. ⁷Na, egoh i Hosuwa nehagtay pelawà, egpangunutan doo sa medoo tegeIslaél Datù Nemula i. Owoy egpangunutan da ma taman sa egoh da nehagtay pelawà sa medoo ulu-ulu mighaa sa langun egkegaipan etaw binaelan i Datù Nemula diyà sa medoo tegeIslaél. ⁸Agulé nematay Hosuwa i anak i Nun sa sinaligan i Datù Nemula. Melatuh sepulù gepalay sa kelukes di egoh di nematay. ⁹Iglebeng da diyà sa hagdi baed tanà dutu Timnat-Silah diyà sa getan-getan diyà sa uwang tanà sa medoo tugod i Ipelaim, denu belabagan sa Getan Gaas.

Ini Sa Ego Da Migsabuh Egpenemula Si Datù Nemula

¹⁰Na, egoh da i Hosuwa nematay owoy sa medoo duma di nesetepengtepeng kelukes, iya daen sa nesamà sa medoo batàbatà endà neketiig da si Datù Nemula owoy endà ma netiigan da duu sa medoo mepion binaelan di diyà sa medoo tegeIslaél. ¹¹Huenan di, binaelan sa medoo tegeIslaél sa medaet diyà sa kehaa i Datù Nemula owoy pinenemula da polo sa Baal.^c ¹²Migsabuh da dé egpenemula si Datù Nemula, sa Nemula egpigtuuwen sa medoo tupù da owoy sa mig-uwit kenagda kedu Igiptu dò. Mig-edung da polo egpenemula sa medoo egpenemulawen sa medoo liyu balangan etaw eg-ugpà medapag diyà kenagda owoy migligkued da diyà sa taengan da. Huenan di, tigtu egpebuliten da Datù Nemula i ¹³enù ka ininiyugan da kagdi i owoy

^b 2:5 Diyà sa kagi Hibelu, etaw egsinegaw sa selepangan sa kagi Bokim. ^c 2:11 Siini Baal sa nemula egpigtuuwen sa medoo tegeKanan owoy sa medoo liyu etaw medapag diyà kenagda. Iya sa penemdem da, maama sa nemula da Baal owoy kagdi sa egpeobol sa medoo bayi owoy sa medoo hinagtay da ma. Huenan di, medoo sa kadupangan egbaelan da amuk egpenemulawen da si Baal.

egpenemulawen da polo sa Baal owoy sa Astalot.^d ¹⁴Na, danà sa kebulit i Datù Nemula sa medoo tegeIslaél, huenan di pinandayà di dé kagda anì tumaban sa medoo kuntelà da tegepengayaw owoy anì mepeka da ma sa medoo langun taman da. Tigtu endà duen megaga sa medoo tegeIslaél sumegumalang. ¹⁵Uman mangay da gumila, egkuntelaen i Datù Nemula dema kagda anì tabanan da, lagà mendaa sa inikagi di diyà kenagda egoh di migpasad diyà kenagda. Huenan di, egkepasangan da temù.

¹⁶Na, apiya di pa eg-indawen i Datù Nemula sa medoo tegeIslaél, duen doo sa medoo ulu-ulu ginela di anì umaluk kenagda kedu diyà sa egkegaga sa medoo tegepengayaw. ¹⁷Dodoo tapay doo endà egdinegdineg sa medoo tegeIslaél diyà sa medoo ulu-ulu da. Ininiyugan da Datù Nemula i enù ka egkeiyapan da polo egpenemula sa medoo liyu egpenemulawen da owoy pineulan da ma sa kepangunut da diyà sa medoo uledin i Nemula pinangunutan sa medoo tupù da. ¹⁸Uman dumuen sa ulu-ulu da gelalen i Datù Nemula, tabangan di anì mealukan sa medoo tegeIslaél kedu diyà sa medoo kuntelà da taman sa egoh di mehagtay pelawà sa ulu-ulu da. Enù ka eghiduwan i Datù Nemula doo kagda danà da migdolongdolong egoh da nepasangan danà sa dakel lihay da. ¹⁹Dodoo amuk mematay dé sa ulu-ulu da ginela i Nemula, pelikù dema sa medoo tegeIslaél diyà sa tapay adat da owoy uman pa dema medaet sa egbaelan da diyà sa kedaet binaelan sa medoo tupù da. Egpenemulawen da dema sa medoo liyu egpenemulawen da owoy eg-uman da egbael medaet enù ka metegas sa ulu da.

²⁰Na, danà iya wé binaelan da, egkeumanan sa kebulit i Datù Nemula diyà sa medoo tegeIslaél. Guwaen di, “Tigtu migtipay siini medoo etaw diyà sa nesepasadan ké sa medoo tupù da, owoy endà ma egpangunutan da duu sa igsugù ku. ²¹Huenan di, endà dé hemagawan ku duu sa medoo nesamà tegeKanan eg-ugpà pelawà diyà siini tanà egoh i Hosuwa nematay. ²²Enù ka ipeukit ku diyà kenagda sa ketepeng ku sa medoo tegeIslaél anì mehaa amuk tuu sa kepangunut da diyà sa uledin ku amuk éhè mendaa sa kepangunut sa medoo tupù da.” ²³Huenan di, pinandayà i Datù Nemula sa keugpà sa medoo tapay etaw nesamà dahiya sa endà pa tinabanan i Hosuwa duu owoy endà ma eghemagawan di duu kagda mapes.

Ini Sa Egoh Da I Dibolah Owoy Si Balak Migtaban Si Sisala

(Tegekukum 4:1-16)

4 ¹Na, egoh di nematay Ihud i sa sebaen ulu-ulu ginela i Datù Nemula, migbael dema salà sa medoo tegeIslaél diyà si Datù

^d 2:13 Siini Astalot ma sa egpenemulawen sa medoo etaw egpenemula si Baal. Diyà sa penemdem da, bayi sa nemula da Astalot. Diyà sa uman kenà da egsimbà diyà sa Astalot, duen sa igbugsud da inetaw Astalot.

Nemula. ²Huenan di, pinandayà i Datù Nemula Habin i, sa datù tegeKanan diyà sa menuwa Hasol, anì endà mekeatu sa medoo tegeIslaél. Iya sa ulu-ulu sa medoo sundalu i Habin si Sisala kedu diyà sa menuwa Halosét diyà sa tanà etaw beken Hudiyu. ³Na, duen siyow gatus kalitun putow i Habin sa atung eggamiten di eggila. Na, tigtu pinelihay di temù sa medoo tegeIslaél taman duwa pulù gepalay. Huenan di, migpegeni da dema tabang diyà si Datù Nemula.

⁴Na, egoh iya, si Dibolah sawa i Lapido sa bayi tegesugkow kagi i Nemula owoy kagdi dema sa nekesetugdug ulu-ulu ginelal i Nemula eg-ipat sa medoo tegeIslaél. ⁵Iya sa adat di, takà egpenuu diyà sa pesu kayu pinengadanan da Kayu i Dibolah diyà sa neseteliwadaan sa menuwa Lama owoy menuwa Bétél diyà sa getan-getan sa uwang tanà sa medoo tugod i Ipelaim. Mig-angay sa medoo tegeIslaél diyà kenagdi anì ipeantang da sa kesesigbolowoy da.

⁶Na, sebaen agdaw igsugù i Dibolah Balak i anak i Abinoam kedu diyà sa menuwa Kades diyà sa uwang tanà sa medoo tugod i Naptali. Egoh i Balak migtebow, mig-ikagi Dibolah i diyà kenagdi, guwaen di, “Ini sa igsugù i Datù Nemula sa egpigtuuwen ta, guwaen di diyà keniko, Hemili ko sa salagsà sundalu diyà sa umpung tugod i Naptali owoy sa umpung tugod i Sabulon, owoy uwit ko kagda angay diyà sa Getan Tabol. ⁷Enù ka pegetungen i Nemula Sisala i sa ulu-ulu sa medoo sundalu i Habin anì gilawen di kiyu diyà sa lawa't wayeg Kison, lapeg sa medoo sundalu di owoy sa medoo kalitun di atung eggamiten di eggila. Dodoo ipelugpì i Nemula doo kagda diyà keniyu.”

⁸Migsagbi Balak i diyà si Dibolah, guwaen di, “Mangay a doo amuk munut ka diyà kenak. Dodoo amuk endà munut ka, endà ma mangay a dutu.”

⁹Mig-ikagi Dibolah i, guwaen di, “Amuk hediya, munut a doo diyà keniko. Dodoo endà meolò ka etaw enù ka beken kuna sa peimatayen i Datù Nemula si Sisala. Bayi polo sa mekepatay kenagdi.” Agulé mig-unut ma Dibolah i diyà si Balak eg-angay diyà Kades. ¹⁰Aglulé sinetipon i Balak diyà Kades sa umpung tugod i Naptali owoy sa umpung tugod i Sabulon. Hê, duen salagsà sundalu mig-unut diyà kenagdi, owoy mig-unut ma Dibolah i.

¹²Na, egoh i Sisala tinulonon etaw dutu Getan Tabol dò Balak i anak i Abinoam, ¹³sinetipon i Sisala sa siyow gatus kalitun atung eggamiten di eggila owoy sa langun sundalu di ma. Mig-ipanaw da kedu diyà menuwa Halosét mangay diyà sa lawa't wayeg Kison.

¹⁴Aglulé mig-ikagi Dibolah i diyà si Balak, guwaen di, “Ipanaw yu dé angay gila enù ka peatuwen i Datù Nemula kiyu diyà si Sisala ini egoh di. Si Datù Nemula sa humuna diyà keniyu anì tumaban yu.” Agulé miglungel Balak i owoy sa salagsà sundalu di diyà sa Getan Tabol. ¹⁵Hê,

egoh da i Balak miggila kenagda, igpelugpi i Datù Nemula Sisala i owoy sa medoo sundalu di ma. Hê, miglaway Sisala i kedu diyà sa kalitun inedaan di owoy migletu egpelaguy. ¹⁶Dodoo linohot da i Balak sa medoo sundalu egpelaguy mig-edà kalitun taman nekeuma da diyà sa menuwa Halosét owoy inimatayan da sa langun sundalu i Sisala. Apiya sebaen, endà duen sa nesamà.

¹⁷⁻²⁴Na, egoh sa langun sundalu i Sisala migpelaguy, miglidung Sisala i diyà sa kemalig i Hibél. Agulé egoh di neketudug danà di neliteg, inimatayan i Hayél sawa i Hibél. Huenan di, neketuu dé iya wé tinulon i Datù Nemula beken si Balak sa nekeimatay si Sisala, dodoo bayi polo.

Ini Sa Egoh I Nemula Miggelal Si Gidiyon Kaunutan Da

6 ¹Na, migbael dema salà sa medoo tegeIslaél diyà si Datù Nemula. Huenan di, igpelugpi di kagda diyà sa medoo tegeMidiyan taman pitu gepalay. ²Endà duen egkegaga sa medoo tegeIslaél egsulì diyà sa medoo tegeMidiyan egpelihay kenagda. Huenan di, miglidung da diyà sa takub diyà sa getan-getan ataw ka sumalà dé sa kenà da eglidung. ³Uman humemula sa medoo tegeIslaél sa medoo balangan eghemulaen, tumebow dema sa medoo tegeMidiyan owoy sa medoo tegeAmalék owoy sa medoo liyu balangan etaw kedu diyà sa tanà denu tebowon agdaw enù ka gilawen da kagda. ⁴Mig-angay da egpetigdeg kemalig dahiya owoy tigtu pinedaetan da ma sa langun hinemula sa medoo tegeIslaél taman sa uwang menuwa Gasa. Pineka da ma sa langun hinagtay sa medoo tegeIslaél, huenan di endà dé duen sa kenà da kumuwa sa kehagtayan da. ⁵Takà egsetebowtebow sa medoo tegeMidiyan lagà sa medoo kasuk. Inuwit da ma sa medoo kemalig da owoy sa langun hinagtay da. Endà mebilang di sa kedoo etaw owoy sa kedoo hinagtay da kamiliyu enù ka medoo da temù, huenan di tigtu pinedaetan da iya wé tanà. ⁶Endà egpekegaga sa medoo tegeIslaél diyà sa medoo tegeMidiyan. Tigtu nepasangan da temù, huenan di migpegeni da dema tabang diyà si Datù Nemula.

⁷Na, egoh i Datù Nemula migdineg sa keingonoy sa medoo tegeIslaél danà da pinelihay sa medoo tegeMidiyan, ⁸pineangay di diyà kenagda sa tegesugkow kagi di. Guwaen di, “Ini sa kagi i Datù Nemula sa egpigtuuwen sa medoo tegeIslaél. Linaun di kiyu kedu diyà sa egoh yu neudipen dutu Igipitu dò. ⁹Inalukan di ma kiyu kedu diyà sa kepelihay sa medoo tegeIgiptu keniyu owoy kedu diyà sa egkegaga sa medoo liyu etaw egkuntelà keniyu diyà siini tanà. Hinemagawan di kagda egoh yu migseilud-ilud enù ka igbegay di diyà keniyu sa tanà da. ¹⁰Inikagiyan di ma kiyu kagdi si Datù Nemula sa egpigtuuwen yu, huenan di hinawidan di kiyu egpenemula sa medoo egpenemulawen sa tegeAmoliya, sa tapay etaw mig-ugpà diyà siini tanà kenà di migpeupgà keniyu. Dodoo endà egdinegdinegen yu duu sa inikagi di.”

¹¹Agulé migtenà sa Egsugùsuguen i Datù Nemula diyà sa menuwa Opela owoy migpenuu diyà sa pesu kayu tugas. Na, iya sa épê di si Howas tugod i Abiyésal. Na egoh iya, telibubu eg-elik teligo Gidiyon i anak i Howas diyà sa nekelidung atung kenà da eghemeg sa bunga palas anì endà hauwen sa medoo tegeMidiyan duu. ¹²Egoh sa Egsugùsuguen i Datù Nemula migpehaa diyà si Gidiyon, mig-ikagi, guwaen di, “Eg-unutan doo i Datù Nemula kuna i mebalaw owoy mebagel etaw.”

¹³Migsagbì Gidiyon i, guwaen di, “O Datù, amuk tuu kami sa eg-unutan i Datù Nemula, maen di ya éhê ini i sa egkebaelan ké ini egoh di? Maen di ya endà egbaelan di duu sa medoo egkegaipan etaw igoh, lagà mendaa sa binaelan di egoh anay egoh di mig-uwit sa medoo tupù ké kedu Igiptu dò iling sa tinulon sa medoo lukes ké diyà kenami? Dodoo sinalidan i Datù Nemula polo kami. Enù ka amuk endà sinalidan di duu kami, maen di ya atu igpeukit di diyà kenami sa kepelihay sa medoo tegeMidiyan?”

¹⁴Agulé mig-ikagi Datù Nemula i diyà si Gidiyon, guwaen di, “Angay ko aluki sa medoo tegeIslaél anì mekelaun da kedu diyà sa kedatuan sa medoo tegeMidiyan, enù ka dumuen sa dakel egkegaga ko danà ku egsugù keniko.”

¹⁵Migsagbì Gidiyon i, guwaen di, “O Datù, enù sa ukit kealuk ku sa medoo tegeIslaél? Enù ka endà duen egkegaga sa malayan ké diyà sa umpung tugod i Manasa, owoy aken sa tigtu nekeleketanà diyà sa malayan ké.”

¹⁶Agulé mig-ikagi Datù Nemula i, guwaen di, “Mekegaga ka doo umaluk sa medoo tegeIslaél enù ka tabangan ku kuna. Tigtu tabanan ko sa medoo tegeMidiyan lagà ka daa egbalà sa segeetaw.”

¹⁷Migsagbì Gidiyon i, guwaen di, “Amuk tigtu egketuuwan ka diyà kenak, pehauwi ko diyà kenak sa tandà kuna si Datù Nemula eg-ikagi diyà kenak. ¹⁸Amuk mebaluy, yaka pelawà eglegkà ya, hih, taman endà duen sa kaenen mekebegay ku diyà keniko.”

Guwaen i Datù Nemula, “Na, angatan ku taman pelikù ka.”

¹⁹Huenan di, mig-angay Gidiyon i mig-imatay sa nati kambing, owoy tinabel di. Inilegà di ma sa sepulù owoy walu kakilu alina anì baelan di sa epan endà duen ipelenuk di. Egoh di nelegà dé sa kaleni, dinalem di alat owoy dinalem di kuden sa sabaw di. Agulé igtenà di diyà sa taengan sa Egsugùsuguen i Datù Nemula diyà siedò pesu kayu tugas. ²⁰Mig-ikagi sa Egsugùsuguen i Datù Nemula diyà kenagdi, guwaen di, “Tenai ko sa kaleni owoy sa epan diyà siini dakel batu, owoy hudud ko ma dahiya sa sabaw di.” Hê, pinangunutan i Gidiyon sa igsugù di. ²¹Agulé igtuedek sa Egsugùsuguen i Datù Nemula sa tuked egsabaan di diyà siedò kaenen. Hê, petow dé miglegleg sa apuy kedu diyà sa batu owoy neulow sa kaleni owoy sa epan, owoy nekedan ma dé sa Egsugùsuguen i Datù Nemula.

²²Agulé netiigan i Gidiyon iya sa mig-ikagi diyà kenagdi sa Egsugùsuguen i Datù Nemula. Huenan di, tigtu nelimedangan owoy

guwaen di, “Aba! O Datù Nemula sa épê dakel egkegaga. Ngadan sa mebaelan ku ini egoh di enù ka hinaa ku owoy tinaeng ku ma sa Egsugùsuguen ko.”^e

²³Dodoo mig-ikagi Datù Nemula i diyà kenagdi, guwaen di, “Petanà ko sa pedu ko. Yaka egkelimedangan na, enù ka endà mematay ka.” ²⁴Agulé binaelan i Gidiyon dahiya sa atung kenà da eg-ulow sa ibegay da diyà si Datù Nemula, owoy pinengadanan di iya wé si Datù Nemula sa Egpetanà Pedu Ta. Na, dahiya doo taman ini egoh di iya wé binaelan di diyà sa menuwa Opela kenà sa medoo tugod i Abiyésal eg-ugpà.^f

Ini Sa Egoh I Gidiyon Migpangunut Diyà Sa Igsugù I Nemula

²⁵Na, egoh di sumigep dé, mig-ikagi Datù Nemula i diyà si Gidiyon, guwaen di, “Angay ko sa keduwa maama sapi i Emà ko, sa pitu dé gepalay sa kelukes di.”^g Owoy angay ko ma lukat siedò atung kenà sa emà ko eg-ulow sa ibegay di diyà sa Baal, owoy kasing ko ma siedò kayu inetaw Astolot igbugsud medapag dahiya. ²⁶Agulé baeli ko sa atung kenà ko eg-ulow sa ibegay ko diyà kenak dutu siedò getan, aken i Datù Nemula sa egpigtuuwen ko. Pepion ko sa kebael ko, owoy amuk meubus ko dé, sekelengkeleng ko sa kayu inetaw Astolot enù ka iya sa temeg ko amuk ulowen ko sa maama sapi amuk egpenemulawen ko aken.”

²⁷Huenan di, inuwit i Gidiyon sa sepulù geetaw diyà sa medoo egsuguen di, owoy binaelan da sa langun igsgugù i Datù Nemula diyà kenagdi. Sigep sa egoh da migbael enù ka egkelimedangan Gidiyon i sa medoo malayan di owoy sa medoo duma di diyà sa menuwa da.

²⁸Na, egoh di magtu kesimag egoh sa medoo etaw mig-enaw, hinaa da nedaetan dé sa atung kenà da eg-ulow sa ibegay da diyà sa Baal, owoy nekedan ma dé sa kayu inetaw Astolot igbugsud medapag dahiya. Owoy neulow ma dé iya wé maama sapi diyà sa magtu atung kenà da eg-ulow sa ibegay da diyà si Nemula. ²⁹Agulé egseigsaay da, guwaen da, “Ngadan di etaw sa migbael ini i?” Egoh da dé temù egseigsaay, netiigan da si Gidiyon anak i Howas sa migdanà iya wé.

³⁰Agulé mig-angay sa medoo ulu-ulu diyà si Howas, owoy guwaen da, “Pelesut ko sa anak ko anì imatayan ké, enù ka pinedaetan di sa kenà ta egsimbà diyà sa Baal owoy kinasang di ma sa kayu inetaw Astolot medapag dahiya.”

³¹Dodoo mig-ikagi Howas i diyà sa langun etaw egkuntelà kenagdi, guwaen di, “Enù di ya, sulian yu Baal i? Maen di ya egtugutan yu iya wé? Mepion pa amuk meimatayan sa etaw sumulian si Baal egoh di

^e 6:22 Basa ko Éksodo 33:20 ^f 6:24 Beken taman ini egoh di egoh ta nehagtay, dodoo taman daa sa egoh sa etaw migsulat ini i. ^g 6:25 Mebaluy ma guwaen di “Angay ko sa maama sapi i Emà ko owoy sa sebaen ma maama sapi pitu dé gepalay sa kelukes di.”

endà pa sumimag. Enù ka amuk tigtu nemula kagdi i, sumulì doo danà di nedaetan sa atung kenà etaw di eg-ulow sa ibegay da diyà kenagdi.”

³²Na, edung egoh iya, si Hélobaal dé sa kepengadan da si Gidiyon danà iya wé inikagi i Howas, guwaen di, “Sumulì doo Baal i danà di nedaetan sa atung kenà etaw di eg-ulow sa ibegay da diyà kenagdi.”

³³Agulé nesetipon sa medoo tegeMidiyan owoy sa medoo tegeAmalék owoy sa medoo liyu balangan etaw kedu diyà sa tanà denu tebowon agdaw, owoy migbatas da ma sa lawa't Holdan owoy migpetigdeg da ma kemalig diyà sa sugud Hésilil. ³⁴Agulé linuhub sa suguy i Datù Nemula Gidiyon i. Huenan di, eghiyupen di sa tegbuli di binaelan sidung kebilibili enù ka eg-umowen di sa langun maama tugod i Abiyésal anì umunut da diyà kenagdi. ³⁵Pineuwitan di ma kagi sa medoo etaw diyà sa umpung tugod i Manasa owoy sa umpung tugod i Asél owoy sa umpung tugod i Sabulon owoy sa umpung tugod i Naptali. Hê, neseunut sa medoo etaw pineuwitan di kagi eg-angay diyà si Gidiyon.

³⁶Agulé mig-ikagi Gidiyon i diyà si Nemula, guwaen di, “Amuk tuu sa inikagi ko aken sa hinemilì ko umaluk sa medoo tegelslaél, duen sa egpegeniyen ku diyà keniko. ³⁷Ini egoh di itenà ku sa bulbul kebilibili diyà siini atung kenà ké eg-elik teligo. Amuk ini daa sa mepelê danà aglù amuk umenaw simag owoy amuk metikal doo sa tanà nekeulingut, metiigan ku doo aken sa hinemilì ko mekealuk diyà sa medoo tegelslaél.” ³⁸Hê, tuu doo iya sa nebaelan. Egoh di sumimag, miglapus mig-enaw Gidiyon i enù ka inangay di egtelow. Egoh di migbelut sa bulbul kebilibili, nepenù wayeg aglù sa bilu.

³⁹Agulé mig-ikagi dema Gidiyon i diyà si Nemula, guwaen di, “Mepion amuk endà bulitan ko duu aken danà ini i egpegeniyen ku dema diyà keniko, enù ka tepengan ku dema anì metiigan ku sa uyot ko. Ini sa ungayà ku metikal siini bulbul kebilibili dodoo mepelê aglù sa tanà nekeulingut.” ⁴⁰Hê, egoh iya wé sigep, hediya doo sa binaelan i Nemula. Netikal iya wé bulbul kebilibili dodoo atung nepelê danà aglù sa tanà ulingut di.

Ini Sa Egoh Da I Gidiyon Miglugpì Sa Medoo TegeMidiyan

(Tegekukum 7:1-22)

7 ¹Na, egoh di sumimag, miglapus da mig-ipanaw Gidiyon i sa pinengadanan da si Hélobaal owoy sa langun etaw di, owoy migpetigdeg da kemalig medapag diyà sa tebulan Halod. Denu belabagan sa medoo tegeMidiyan diyà sa sugud medapag diyà sa Getan Moléh.

²Agulé mig-ikagi Datù Nemula i diyà si Gidiyon, guwaen di, “Temù medoo siini etaw eg-unut diyà keniko. Iya kéen sa penemdemen da guwaen da danà sa hagda daa egkegaga sa kelugpì da sa medoo

tegeMidiyan, beken danà sa ketabang ku. ³Huenan di, ikagi ko diyà kenagda anì lumikù sa medoo etaw egpesu eggila.” Hê, egoh i Gidiyon mig-ikagi iya wé diyà kenagda, miglikù sa duwa pulù owoy duwa ngibu geetaw. Hê, salagsà daen sa nesamà.

⁴Dodoo mig-ikagi dema Datù Nemula i diyà si Gidiyon, guwaen di, “Tapay doo medoo sa etaw ko. Huenan di, uwit ko kagda diyà sa kilidan lawa't wayeg. Amuk dutu yu, ipetiig ku diyà keniko sa tayu di etaw sa peunuten ko owoy sa endà peunuten ko duu.” ⁵Agulé egoh i Gidiyon mig-uwit kenagda diyà sa lawa't wayeg, mig-ikagi Datù Nemula i diyà kenagdi, guwaen di, “Setigesà ko sa medoo etaw migsakug belad da daa owoy sa medoo etaw migligkued tulen dé egduem.” ⁶Hê, telu latuh daa sa kedoo etaw eg-inem egsakug belad, dodoo tulen dé migduem sa medoo duma da.

⁷Agulé mig-ikagi Datù Nemula i diyà si Gidiyon, guwaen di, “Siedò telu latuh etaw migsakug belad egoh da mig-inem, iya daa sa peunut ko mangay gumila diyà sa medoo tegeMidiyan. Ipelugpi ku doo sa medoo tegeMidiyan diyà keniyu anì mealukan sa medoo tegeIslaél. Dodoo pelikù ko dé sa medoo liyu etaw.” ⁸Huenan di, pinelikù i Gidiyon sa langun tegeIslaél liyu daa siedò telu latuh geetaw pineipat di sa medoo buyung^h da owoy sa medoo tegbuli kinuwa di diyà sa medoo etaw pinelikù di. Na, diyà sa sugud leketanà da sa kenà sa medoo tegeMidiyan migpetigdeg kemalig.

⁹Na, egoh iya wé sigep, sinugù i Datù Nemula Gidiyon i, guwaen di, “Enaw ka dé. Angay ko pengayaw sa medoo tegeMidiyan, enù ka ipelugpi ku kagda diyà keniyu. ¹⁰Dodoo amuk egpesu ka pelawà, uwit ko sa egsuguen ko si Pula anì mangay yu diyà sa kenà da migpetigdeg kemalig. ¹¹Amuk dinegen ko sa keseolomoy da, kumebalaw ka doo mengayaw kenagda.” Agulé miglungel Gidiyon i owoy si Pula mig-angay diyà sa kilidan sa medoo kemalig sa kuntelà da. ¹²Na, sa medoo tegeMidiyan owoy sa medoo tegeAmalék owoy sa medoo liyu balangan etaw kedu diyà sa tanà denu tebowon agdaw, nebelet da sa sugud kenà da migpetigdeg kemalig. Medoo da temù lagà sa kedoo kasuk, owoy endà ma mebilang di sa kedoo kamiliyu da enù ka lagà sa kedoo enay mantadan.

¹³Na, egoh da i Gidiyon mig-angay migdapag, dinineg da sa etaw migtulon sa tegeinep di diyà sa duma di. Guwaen di, “Egoh ku migtegeinep, hinaa ku sa segetibulu epan sebada nekelid eg-angay diyà sa kenà ta migpetigdeg kemalig. Neambakan di sa kemalig. Hê, nepilay owoy nelubun ma.”

¹⁴Migsagbì sa duma di, guwaen di, “Aba, endà duen sa liyu selepangan iya wé liyu daa sa sundang siedò tegeIslaél, si Gidiyon anak i Howas. Enù

^h 7:8 Duen sa medoo buyung da enù ka iya sa tinaguan da kaenen.

ka iya sa pelugpien i Nemula diyà kenita i medoo tegeMidiyan owoy diyà siini medoo duma ta.”

¹⁵Na, egoh i Gidiyon migdineg iya wé tegeinep owoy sa selepangan di, migligkued eg-olò si Nemula. Agulé migpelikù da diyà sa kenà sa medoo duma da tegeIslaél mig-ugpà. Egoh da migtebow, inenaw di sa medoo duma di owoy guwaen di, “Téél yu dé, enù ka ipelugpi i Datù Nemula doo siini medoo tegeMidiyan diyà kenita.” ¹⁶Aglulé binaed i Gidiyon telu gebaed sa telu latuh etaw di, owoy igbegay di diyà sa uman sebaen etaw sa tegbuli owoy sa buyung inawuhan sulù. ¹⁷Mig-ikagi diyà kenagda, guwaen di, “Amuk medapag ki dé diyà sa kenà da migpetigdeg kemalig, hahaa yu sa baelan ku owoy ilingi yu ma. ¹⁸Amuk dinegen yu sa ketegbuli ké, tegbuli yu ma dé owoy petaled yu ikagi, guwaen yu, “Tumaban Datù Nemula i owoy si Gidiyon.”

¹⁹Aglulé egoh di buyu dé teliwadà sigep egoh sa medoo tegeMidiyan migsambi dé sa tegebantay da, mig-angay Gidiyon i owoy sa melatuh duma di migdapag diyà sa kenà sa medoo tegeMidiyan migpetigdeg kemalig. Hê, migtegbuli da owoy pinesà da ma sa buyung da inawuhan sulù. ²⁰Neseselengan sa telu geumpung etaw i Gidiyon migpesà sa medoo buyung da inawuhan sulù owoy egtegbuli da ma. Egsabà sulù sa bibang da owoy egsabà tegbuli sa kuwanan da. Migpetaled da ma eg-ikagi, guwaen da, “Tumaban Datù Nemula i owoy si Gidiyon.” ²¹Sineulingutan da daa egtigdegan sa kilidan sa medoo kemalig sa medoo kuntelà da. Dodoo migletu sa langun kuntelà da egpelaguy, owoy miglesing da ma danà da tigtu nelimedangan. ²²Egoh da telibubu egtegbuli sa telu latuh geetaw i Gidiyon, migsetigbasay sa medoo kuntelà da tegeMidiyan danà i Datù Nemula. Nekepelaguy ma sa duma etaw, duen mig-angay diyà Bétsita selatal Séléla owoy duen ma mig-angay diyà sa menuwa Abél-Méhola medapag diyà Tabat.

Ini Sa Egoh I Samson Miglesut

(Tegekukum 13:1-5,24-25)

13 ¹Na, egoh di nelugaylugay dé, migbael dema salà sa medoo tegeIslaél diyà si Datù Nemula, huenan di etaw tegePilistiya sa pinesabà di diyà kenagda taman epat pulù gepalay.

²Na egoh iya, duen sa maama si Manowa tugod i Dan eg-ugpà diyà sa menuwa Solah. Endà eg-anak sa sawa di. ³Aglulé sebaen agdaw, migpehaa sa Egsugùsuguen i Datù Nemula diyà sa bayi owoy guwaen di, “Edung egoh ko migsawa taman ini egoh di endà eg-anak ka. Dodoo endà melugay di kumelalingen ka owoy umanak ka maama. ⁴Huenan di, edung ini egoh di yaka eg-inem duu sa wain owoy sa medoo liyu inemen mekelangut, owoy yaka ma egkaen duu sa melihi egkaenen.

⁵Amuk lumesut sa anak ko maama, yaka egtagged duu sa balut ulu di, enù ka edung sa egoh di lumesut si Nemula dé sa épê di. Kagdi sa umedung umaluk sa medoo tegeIslaél kedu diyà sa egkegaga sa medoo tegePilistiya.”

²⁴Agulé mig-anak maama sa sawa i Manowa, owoy pinengadanan di si Samson. Miglenuk dé sa batà owoy takaan i Datù Nemula egtabangan, ²⁵owoy tinunungan sa Suguy i Datù Nemula egoh di diyà sa kenà sa medoo tugod i Dan migpetigdeg kemalig diyà sa neseteliwadaan menuwa Solah owoy menuwa Éstayol.

Ini Sa Egoh I Samson Migsawa

14 ¹Na, sebaen agdaw egoh i Samson mig-angay diyà sa menuwa Timnah, hinaa di sa kenogon tegePilistiya. ²Agulé egoh di miglikù, tinulonon di sa emà di owoy sa inay di, guwaen di, “Hinaa ku sa kenogon tegePilistiya dutu Timnah dò. Huenan di, pegeni yu diyà kenak enù ka sawaen ku.”

³Dodoo mig-igsà sa emà di owoy sa inay di diyà kenagdi, guwaen da, “Maen di ya egkeiyapan ko sumawa sa bayi sa medoo tegePilistiya endà egpigtuu diyà si Nemula? Enù di ya, endà duen sa bayi egkeiyapan ko sumawa diyà sa umpungan ta ataw ka diyà sa medoo duma ta tegeIslaél?”

Dodoo sinagbian i Samson sa emà di, guwaen di, “Iya polo sa egkeiyapan ku sumawa, huenan di kuwa yu diyà kenak.” ⁴Na, endà netiigan sa emà di owoy sa inay di duu danà i Datù Nemula sa kekeiyap di sumawa sa tegePilistiya enù ka egbaelan i Nemula sa ukit di gumila diyà sa medoo tegePilistiya, enù ka egoh iya tegePilistiya sa egsabà sa tanà Islaél.

⁵Agulé mig-angay Samson i Timnah dò owoy mig-unut ma sa emà di owoy sa inay di enù ka pegeniyen da sa bayi sawaen di. Egoh da pelawà eg-ukit diyà sa dalan migtelek diyà sa hinemulaan palas, dinineg i Samson sa anak liyun eg-inigel kenagdi. ⁶Petow dé migkebagel Samson i danà sa Suguy i Datù Nemula. Huenan di, apiya di pa endà duen sa kinemkem di, sinebugtus di daa sa liyun lagà daa egbugtus sa nati kambing. Dodoo endà tinulonon di duu sa emà di owoy sa inay di sa binaelan di. ⁷Agulé inangay i Samson eg-olomon sa kenogon, owoy tigtu egkeiyapan di.

⁸Na, egoh di nelugaylugay, egpelikù dema Samson i enù ka pekawingan di sa kenogon. Egoh di nekeselatal diyà sa kenà di mig-imatay sa liyun, migselab enù ka inangay di egtelow sa inimatayan di. Egoh di mighaa, duen sa medoo temaing egbalay owoy épê teneb diyà sa liyun inimatayan di. ⁹Kinuwa di sa teneb owoy kinaen di egoh di telibubu eg-ipanaw. Mig-angay diyà sa emà di owoy sa inay di owoy

binegayan di ma kagda owoy migkaen da ma. Dodoo endà tinulon di duu diyà kenagda amuk kinuwa di diyà sa liyun inimatayan di.

¹⁰Na, egoh da i Samson migtebow, mig-angay sa emà di diyà sa dalesan siedò kenogon, owoy dahiya sa kenà i Samson migbael pista enù ka iya sa adat sa medoo melaud amuk sumawa da. ¹¹Egoh sa medoo tegePilistiya mighaa kenagdi, pineangay da sa telu pulù melaud egpeduma diyà kenagdi. ¹²Agulé mig-ikagi Samson i diyà kenagda, guwaen di, “Pegeatukan ku kiyu, hih. Amuk mesagbian yu egoh di endà pa meelut sa kepitu di agdaw sa pista kawing, ibegay ku diyà keniyu sa telu pulù mapulù kegal binaelan lino owoy sa telu pulù kegal tigtu mepion palas. ¹³Dodoo amuk endà mesagbian yu duu, aken polo sa mebegayan yu sa telu pulù mapulù kegal binaelan lino owoy sa telu pulù kegal tigtu mepion palas.”

Mig-ikagi da langun, guwaen da, “Na, tulon ko dé sa pegeatuk ko diyà kenami.”

¹⁴Agulé egpegeatuk Samson i, guwaen di, “Kedu diyà sa tegekaen, miglesut sa kaenen. Owoy kedu diyà sa mebagel, miglesut sa meemis.”

Na, taman telu agdaw endà pelawà egsagbian da duu iya wé igpegeatuk di. ¹⁵Agulé, egoh di neuma sa keepat di agdaw, mig-ikagi da diyà sa bayi sawaen i Samson, guwaen da, “Akali ko sa sawa ko anì metulon di diyà kenami sa ngadan sa igpegeatuk di. Amuk endà mangunut ka, temteman ké siini dalesan i Emà ko anì mekelapeg ka ma meulow.ⁱ Iya kéen sa pesuwan yu egpelenged kenami diyà siini pista anì mesapul sa langun taman ké.”

¹⁶Agulé mig-angay sa kenogon diyà si Samson. Egsinegaw egoh di eg-ikagi, guwaen di, “Egkelepuhan ko kéen aken. Endà eghiduan ko duu aken, enù ka pinegeatukan ko sa medoo duma ku tegePilistiya, dodoo endà tinulonon ko duu aken sa selepangan di.”

Migsagbi Samson i, guwaen di, “Taa ko, apiya sa emà ku owoy sa inay ku, endà tinulonon ku duu kagda, labi pa egtulonon ku kuna ya.” ¹⁷Agulé takà egsinegaw sa bayi owoy eglekleken di eg-igsaan Samson i taman meuma sa kepitu di agdaw sa pista kawing. Huenan di, egoh di neuma dé sa kepitu di agdaw, tinulon i Samson sa selepangan sa pegeatuk di, enù ka eglekleken sa sawa di eg-igsaan. Hê, egoh sa sawa di neketiig, inangay di ma egtulon diyà sa medoo duma di tegePilistiya.

¹⁸Na, egoh di endà pa eg-eled sa agdaw sa kepitu di agdaw sa pista da, mig-angay sa medoo maama tegeTimnah diyà si Samson, owoy mig-ikagi da, guwaen da, “Enù di ya duen pa atu sa uman pa meemis amuk beken teneb? Enù di ya duen pa atu sa uman pa mebagel amuk beken liyun?”

Migpeligad Samson i diyà kenagda, guwaen di, “Amuk endà igdadu yu duu sa sapi ku, endà metiigan yu duu sa selepangan sa igpegeatuk ku.”

ⁱ 14:15 Mebaluy ma guwaen di, “mekelapeg ka owoy sa malayan ko ma meulow.”

¹⁹Agulé petow dé migkebagel Samson i danà sa Suguy i Datù Nemula. Hê, mig-angay diyà sa menuwa Askelon owoy inimatayan di sa telu pulù tegePilistiya. Kinuwa di sa ginis da owoy igbegay di diyà siedò medoo etaw migtulon sa selepangan sa pegeatuk di. Agulé tigtu migbulit Samson i danà iya wé nebaelan, huenan di miglikù diyà sa dalesan sa emà di. ²⁰Dodoo sa bayi sawa di, pinesawa sa nugangan di polo diyà sa maama miglambay kenagdi egoh da egkawingen.

Ini Sa Egoh I Samson Migsulì Diyà Sa Medoo TegePilistiya

15 ¹Na, egoh di nelugaylugay, neuma dé sa sasang keketu teligo. Agulé mig-angay Samson i diyà sa sawa di anì mesehulid da owoy inuwit di ma sa nati kambing atang saluan sa sawa di. Egoh di migtebow, mig-ikagi diyà sa nugangan di, guwaen di, “Ungayà ku lumudep a diyà sa bilik sa sawa ku.”

Dodoo endà pineludep sa nugangan di duu. ²Guwaen di diyà si Samson, “Iya sa penemdem ku endà dé mangay ka diyà sa sawa ko enù ka nelepuhan ko dé. Huenan di, igpesawa ku dé diyà sa loyuk ko. Dodoo amuk meiyap ka, iya polo sa ipesawa ku diyà keniko sa hadi di, enù ka uman pa metolol diyà sa kakay di.”

³Migsagbì Samson i, guwaen di, “Danà iya wé binaelan ko, endà dé meselsel ko duu aken ini egoh di amuk duen sa egbaelan ku diyà sa medoo tegePilistiya.” ⁴Hê, inangay i Samson egsigkem sa telu latuh tinggalung. Agulé sinetagkes di sa ikug da tigduwa-duwaay owoy igpolot di sa sulù diyà sa ikug da. ⁵Agulé tinemteman di sa medoo sulù binaelan di owoy linengaan di sa medoo tinggalung diyà sa hinemulaan teligo sa medoo tegePilistiya. Hê, neulow sa hinemulaan da teligo, iling ka sa binagkes dé ataw ka sa endà pa kinetu, neimet da neulow. Owoy mineulow ma sa medoo kayu olibu.

⁶Agulé migseigsaay sa medoo tegePilistiya, guwaen da, “Ngadan di etaw migdanà iya wé?” Agulé netiigan da si Samson migdanà iya wé danà sa nugangan di tegeTimnah migpesawa sa sawa di diyà sa sebaen loyuk di miglenged sa kawing di. Huenan di, inangay sa medoo tegePilistiya ma eg-ulow sa bayi owoy sa emà di. Na, tigtu migbulit Samson i, ⁷owoy guwaen di diyà kenagda, “Danà iya wé binaelan yu diyà kenak, ipengibet ku endà sumabuh a taman endà mekesulì a diyà keniya.” ⁸Hê, eggebeken di kagda, owoy medoo temù sa etaw inimatayan di. Agulé mig-angay eg-ugpà diyà sa takub delama diyà Itam.

⁹Agulé mig-angay ma sa medoo tegePilistiya migpetigdeg kemalig diyà sa tanà sa medoo tugod i Huda owoy migpengayaw da diyà sa menuwa Léhi. ¹⁰Agulé inigsaan sa medoo tegeHuda sa medoo tegePilistiya, guwaen da, “Maen di ya inangay yu kami egpengayaw?”

Migsagbì da, guwaen da, “Iya sa binaelan ké anì sigkemen ké Samson i enù ka sumulì ké diyà kenagdi danà sa medaet binaelan di diyà kenami.”

¹¹Agulé duen telu ngibu geetaw tegeHuda mig-angay diyà sa takub delama diyà Itam. Egoh da migtebow, inigsaan da Samson i, guwaen da, “Enù di ya, endà netiigan ko duu kéen egsabaan sa medoo tegePilistiya daa kita? Maen di ya hediya sa binaelan ko diyà kenagda? Taa ko, hih, nekelapeg ké ma dé danà sa binaelan ko.”

Migsagbi Samson i, guwaen di, “Iya sa binaelan ku enù ka egsulì a ma danà sa binaelan da diyà kenak.”

¹²Mig-ikagi da dema, guwaen da, “Mig-angay ké dahini enù ka sigkemen ké kuna anì ihated ké kuna diyà sa medoo tegePilistiya.”

Guwaen i Samson, “Mebaluy doo iya wé amuk masad yu beken kiyu sa mimatay kenak.”

¹³Guwaen da, “Endà imatayan ké duu kuna. Dodoo sigkemen ké daa kuna anì ihated ké kuna diyà sa medoo tegePilistiya.” Hê, pinolot da sa duwa magtu tali, owoy inuwit da ma kedu diyà sa takub kenà di eg-ugpà.

¹⁴Egoh da migtebow diyà sa menuwa Léhi, miglukiyang sa medoo tegePilistiya ligò da egletu egtelabuk kenagdi. Dodoo petow dé pinebagel sa Suguy i Datù Nemula Samson i. Hê, binugtus di sa tali igpolot da kenagdi, lagà daa egbugtus sa tanul tapay neulow. ¹⁵Agulé egoh di eglangalanga, hinaa di sa negalgal tuelan bahà sa asnu magtu nematay. Hê, kinuwa di owoy ig-imatay di sa sengibu geetaw tegePilistiya.

¹⁶Huenan di, migduyuy Samson i, guwaen di,

“Danà sa tuelan bahà asnu daa, nekepatay a sa sengibu geetaw.

Danà sa tuelan bahà asnu daa, minedugkow sa medoo nematay.”

¹⁷Na, egoh i Samson neubus egduyuy, igbuung di sa tuelan bahà. Pinengadanan da iya wé kenà Lamat-Léhi.^j

¹⁸Agulé tigtu eglupahan Samson i. Huenan di, migpegeni tabang diyà si Datù Nemula, guwaen di, “Pinetaban ko dé aken, dodoo buyu a dé egkematay danà ku eglupahan. Amuk hediya, mesigkem a dema sa medoo tegePilistiya endà epgigtuu diyà keniko.” ¹⁹Hê, pinelesi i Nemula sa tanà diyà Léhi anì lumesut sa wayeg anì mekeinem Samson i. Egoh di mig-inem, migkebagel dema sa nanam lawa di. Na, pinengadanan da iya wé tebulan Hakolé^k owoy dahiya doo sa tebulan diyà Léhi taman ini egoh di.

²⁰Na, duwa pulù gepalay sa lugay i Samson neulu-ulu diyà sa medoo tegeIslaél egoh sa tegePilistiya egsabà sa tanà da Islaél.

Ini Sa Binaelan I Samson Diyà Sa Menuwa Gasa

16 ¹Na, sebaen agdaw mig-angay Samson i diyà Gasa sa menuwa tegePilistiya kenà di mighaa sa bayi tegepediyangdang. Agulé

^j 15:17 Iya sa selepangan Lamat-Léhi diyà sa kagi Hibelu, Getan Tuelan Bahà. ^k 15:19 Iya sa selepangan Hakolé sa Tebulan Tegeumow Diyà si Nemula.

inangay di mighulid. ²Hê, netiigan sa medoo tegeGasa dahiya Samson i, huenan di sineulingutan da sa kenà di owoy duen ma sa egbantay elut sigeip diyà sa bengawan sa kutà menuwa. Endà egdagì da egbantay meelut sigeip, enù ka iya sa penemdem da angatan da daa taman sumimag anì imatayan da Samson i. ³Dodoo egoh di teliwadà sigeip, mig-enaw Samson i owoy mig-angay diyà sa bengawan sa kutà menuwa. Agulé sinabaan di sa pintù di. Hê, binadut di sa duwa bugsud di lapeg sa pakel di ma. Tiniang di owoy inuwit di diyà sa kogol getan selatal sa menuwa Hibelon.

Ini Denu Si Samson Owoy Si Dalila

⁴Na, egoh di nelugaylugay, duen sa bayi tigtu egkeiyapan i Samson diyà sa sugud Solék, si Dalila. ⁵Agulé duen lima datù tegePilistiya mig-angay diyà si Dalila owoy mig-ikagi da, guwaen da, “Akali ko Samson i anì tulonen di diyà keniko sa pesuwan di temù mebagel anì dumuen sa ukit ké sumigkem kenagdi anì melugpì. Amuk baelan ko iya wé, uman sebaen kenami begayan ké kuna sigpuluay owoy telu kakilu pilak.”

⁶Huenan di, inigsaan i Dalila Samson i, guwaen di, “Ngadan sa pesuwan ko temù mebagel? Upama amuk duen etaw egkelukuy egsigkem keniko, ngadan sa ukit kebael di keniko anì endà mekeatu ka?”

⁷Migsagbì Samson i, guwaen di, “Amuk poloten da aken sa pitu magtu tagbes busug endà pa netikal di, mekedan sa kebagel ku owoy lagà a daen sa kebagel sa liyu etaw.”

⁸Agulé igbegay sa medoo datù tegePilistiya diyà si Dalila sa pitu magtu tagbes endà pa netikal di owoy pinolot di Samson i. ⁹Na, duen ma sa medoo tegePilistiya pinelidung di diyà sa sebaen ma bilik. Hê, pinetaled i Dalila sa kagi di, guwaen di, “O Samson, medapag dé dumagpak sa medoo tegePilistiya.” Agulé binugtus i Samson sa tagbes igpolot diyà kenagdi lagà daa egbugtus sa tali eg-ulowen. Huenan di, tapay doo endà netiigan da duu sa pesuwan di tigtu mebagel Samson i.

¹⁰Agulé mig-ikagi Dalila i diyà si Samson, guwaen di, “Ay, egselapanen ko daa aken, owoy tigtu egbutbutan ko ma aken. Na, tulon ko polo diyà kenak sa ukit etaw molot keniko.”

¹¹Migsagbì Samson i, guwaen di, “Amuk mepolot a sa magtu tali endà pa ginamit di, mekedan sa kebagel ku owoy lagà a daen sa kebagel sa liyu etaw.”

¹²Agulé kinuwa i Dalila sa magtu tali owoy pinolot di Samson i, ligò sa medoo tegePilistiya eg-angat-angat diyà sa sebaen ma bilik. Egoh di migpolot dé, pinetaled di dema sa kagi di, guwaen di, “O Samson, medapag dé dumagpak sa medoo tegePilistiya.” Hê, binugtus i Samson dema sa tali lagà daa egbugtus tanul.

¹³Huenan di, inikagiyan i Dalila dema Samson i, guwaen di, “Taman ini egoh di egselapanen ko daa aken owoy tigtu egbutbutan ko ma aken. Na, tulon ko polo diyà kenak sa ukit etaw molot keniko.”

Migsagbì Samson i, guwaen di, “Amuk habelen ko sa balut ulu ku diyà siedò habelan ko owoy peelesen ko ma sumegseg sa kayu di, mekedan sa kebagel ku owoy lagà a daen sa kebagel sa liyu etaw.”

¹⁴Agulé pinetudug i Dalila dema Samson i, owoy hinabel di diyà sa habelan di sa balut ulu i Samson,¹ owoy pineeles di egsegseg. Hê, pinetaled di dema sa kagi di, guwaen di, “O Samson, medapag dé dumagpak sa medoo tegePilistiya.” Hê, mig-enaw Samson i owoy hinagdus di sa balut ulu di kedu diyà sa habelan.

¹⁵Agulé guwaen i Dalila dema diyà kenagdi, “Maen di ya inikagi ko eghiduan ko aken? Endà tuu di humabes, enù ka taa ko, telu dé gulê sinelapanan ko aken, owoy endà ma egtulonen ko duu diyà kenak sa pesuwan ko tigtu mebagel.” ¹⁶Uman agdaw takà eg-igsà sa bayi taman tigtu dé egketepalan Samson i danà di egkeleklek sa keigsà di. ¹⁷Huenan di, tinulon di dé sa tigtu tuu diyà kenagdi. Guwaen di, “Edung egoh ku miglesut, endà duen sa kenà di tinagped sa balut ulu ku enù ka si Nemula sa épê ku. Enù ka amuk metagped sa balut ulu ku, mekedan sa kebagel ku owoy kumelungoy a ma lagà a daen sa kebagel sa liyu etaw.”

¹⁸Na, netiigan i Dalila tinulon i Samson sa tigtu tuu diyà kenagdi, huenan di pineuwitan di kagi sa medoo datù tegePilistiya. Guwaen di, “Angay yu dema dahini, enù ka tinulon di dé diyà kenak sa tuu kagi.” Hê, mig-angay dahiya sa medoo datù owoy inuwit da ma sa pilak ibegay da diyà kenagdi. ¹⁹Agulé pinedanan i Dalila Samson i diyà sa bubun di anì meketudug. Egoh di neketudug dé, igpetagped di diyà sa liyu etaw sa balut ulu i Samson. Hê, inedungan di dé egpelihay Samson i enù ka nekedan dé sa kebagel di. ²⁰Agulé pinetaled i Dalila dema sa kagi di, guwaen di, “O Samson, medapag dé dumagpak sa medoo tegePilistiya.” Hê, mig-enaw Samson i owoy iya sa penemdem di endà mesigkem di éhê sa nebaelan di egoh muna. Dodoo endà netiigan di duu sinalidan dé i Datù Nemula.

²¹Hê, sinigkem sa medoo tegePilistiya Samson i owoy linesò da sa mata di. Agulé inagak da mig-angay diyà sa menuwa Gasa. Pinolot da ma sangkali galang owoy igpetilis da ma kenagdi sa dakel batu gilingan diyà sa bilanguwan. ²²Dodoo egoh di diyà sa bilanguwan, eg-anay-anay dema egketaes sa balut ulu di.

Ini Sa Egoh I Samson Nematay

²³Na, sebaen agdaw nesetipon sa medoo datù tegePilistiya anì mista da owoy ibegay da ma sa medoo hinagtay inimatayan da diyà sa egpenemulawen da si Dagon. Migduyuy da, guwaen da, “Igpelugpi sa nemula ta diyà kenita sa kuntelà ta si Samson.” ²⁴⁻²⁵Tigtu neanggan

¹ 16:14 Duen gaa sa pitu geselapid balut ulu di.

da, huenan di igsugù da Samson i anì pelononon da. Egoh da mighaa kenagdi inuwit kedù diyà sa bilangguwan, migduyuy da eg-olò sa nemula da, guwaen da, “Igpelugpì sa nemula ta diyà kenita siini kuntelà ta sa migpedaet sa tanà ta owoy sa mig-imatay sa medoo duma ta.” Agulé egsuguen da egpeselapan owoy egpetigdegen da diyà sa neseteliwadaan sa duwa dakek bugsud.

²⁶ Agulé mig-ikagi Samson i diyà sa batà atung eg-agak kenagdi, guwaen di, “Pesabai ko kenak sa duwa dakek bugsud siini dalesan^m enù ka ungayà ku sumagdig a dahiya.” ²⁷ Na, tigtu nebelet etaw iya wé dakek dalesan, maama owoy bayi. Dahiya ma sa langun datù tegePilistiya, owoy nekeuma telu ngibu sa kedoo da maama owoy bayi diyà sa atep di mepatag kenà da eghahaa si Samson egpeselapanen da.

²⁸ Agulé migsimbà Samson i, guwaen di, “O Datù Nemula, hiduwi ko aken. Egpegeni a diyà keniko segulê ko pa aken pebagel anì mekesulì a diyà siini medoo tegePilistiya ini egoh di danà da miglesò sa mata ku.” ²⁹ Agulé sinebalà i Samson egsabaan sa duwa dakek bugsud sa dalesan owoy migtikadel ma. ³⁰ Pinetaled di sa kagi di, guwaen di, “Pandayà ko dé aken anì meseselengan ké dé mematay sa medoo tegePilistiya.” Agulé pinebagelan i Samson egsegela sa duwa dakek bugsud. Hê, nelubunan sa dakek dalesan sa medoo datù tegePilistiya owoy sa langun etaw dahiya. Huenan di, uman pa sa kedoo etaw inimatayan i Samson egoh di nematay ma dé diyà sa kedoo etaw inimatayan di egoh di nehagtay pelawà.

³¹ Agulé inangay sa medoo hadi di owoy sa medoo duma telahadi di Samson i, enù ka ilebeng da diyà sa tapay kenà lebeng sa emà di, si Manowa, diyà sa neseteliwadaan sa menuwa Solah owoy menuwa Éstayol. Na, duwa pulù gepalay sa lugay i Samson kaunutan diyà sa medoo tegeIsaél.

^m 16:26 Sa dakek dalesan sa kenà da egpenemula sa nemula da si Dagon.